

**Friday, March 6, 2026**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**EDN MINISTER**

Higher & Technical Education minister Dr Vanlalhlana chuan college hrang hranga UGC-in a phut anga tling lo zirtirtute chu tun thla bak rawih chhunzawm an nih tawh dawn loh thu vawiin khan House-ah a sawi. RUSA hnuai zirtirtu lakte ngheh theihna tur an ngaihtuah thu a sawi bawk.

Vawiina Assembly Session zawhna chhangin Dr Vanlalhlana chuan unqualified teacher-te ban tir mai loa an qualify theih nan chance pek an ni em tih zawhna chungchangah Dr Vanlalhlana chuan, University Grand Commission (UGC)-in National Eligibility Test (NET) a phut ang nei lote chu chhawr chhunzawm an nih tawh dawn lo a, hreh tak chungin an mahni rawih chhunzawmna tur hi March thla atang chuan a tawp ta a ni, a ti.

Dr Vanlalhlana chuan heng unqualified teacher-te hi dem ngawt theih an nih loh thu a sawi a, hnaa lak an nih dawna advertisement-ah NET phut tel a nih loh thu leh a hnuah sorkarin NET nei turin a tih leh thu a sawi a ni.

(BYTE - Dr Vanlalhlana, HTE Minister )

MPSC-in kum 2019-a RUSA hnuai zirtirtu a lakte chu kum 2 an thawh tlin tawh chuan CSS hnuai mi an nih tawh loh thu leh kum 2 hnuah chuan an hlawh hi state sorkarin a pek vek tawh thu Dr Vanlalhlana chuan a sawi a; sorkarin ‘kum 2 hnuah a liability an tum ang’ tiin a lo intiam tawh a, ZPM sorkar chuan an nghehna tur ngaihtuahin, Council of Minister in a ngaihtuah tawh a, thil nghah hlek ngai, ngaihven ngai thil ala awm a, ngaihven a nih zawhah chuan an chungchang hi chu a rawn chhuak thuai ang a, an ngheh theihna tur ngaihtuah a ni, a ti.



**MUHCS**

Mizoram Universal Healthcare Scheme (MUHCS) zawm duha sorkar dawrtu Mizoram chhunga private damdawi-in 13 leh sorkar chuan damlo enkawlina leh a kaihnhawih man chungchangah inremna an la nei thei lo.

Mizoram State Healthcare Society (MSHCS) hotute chuan Akashvani News Aizawl zawhna chhangin, nikum kumtawp lama MUHCS zawm duhtu Mizoram chhunga private damdawi-in 13-te indawrna an la neih mek thu an sawi a, private damdawi-in ten sorkara an rate duh ang an thehluh chu sorkarin rate a siam dan (package system) nen siamrem theih a nih loh thu an sawi.

Kan corr report lo ngaithla ang.

*MUHCS hotute chuan private damdawi-inte hian an rate neihsa atanga zaa 10-a hniamin MUHCS an kalpui theih thu an thehluh tih an sawi a; hei hi sorkar*

*package system nen a kalphung a inan loh avangin siamtha leh turin an ngen a, rate an duh dan an siamthatna hi private damdawi-inte hian sorkarah an la thehluh rih loh thu an sawi a ni.*

*Mizoram sorkar chuan tunthla ni 3 khan MUHCS kalpuitu damdawi-in hrang hrang hnenah damlo enkawlna senso atan cheng vbc 8 point 19 an pe chhuak a, heti hian nikum April ni 1 atanga tun thla ni 3 thleng khan sorkar chuan MUHCS kalpuitu damdawi-inte hnenah damlo nuai 1, sang 2 & 188 enkawlna senso atan cheng vbc 156 point 35 an pe chhuak tawh a ni..*



## **MNF**

MNF Party Gen Secy Pu K LalSawmvela chuan Chief Minister in kum 5 sorkar chhungin pension 24,021 an tifel tia a sawi chua a thalo zawnga mipui rilru hruaikawi thei leh sorkar hmasa MNF dem zawnga sawina, fiah leh mai theih thu diklo a ni, a ti.

Pu LalSawmvela chuan Sorkar hnathawk nghet pension nei thei hi mi 40,000 velah chhut ni ta se, a nghet lova thawk pension neilo CSS employee 14,000 vel leh Provisional Employee 6500 vel awm bawkin, a nghet lova thawk, pension pangngai neilo chu 20,400 vel an ni. Central sorkarin October 2010 a chin lak thar chu pension nei thei tawh lo turin a ti a. Chuvangin pension nei thei hi a tam lamah 40,000 ah chhut theih a ni a, a chanve aia tam hret 24,021 lai mai MNF sorkar kum 5 chhunga pension hum hum a, an pension tihfel ngai awm thup anga Chief Minister leh a Minister-te thusawi kha thudiklo a ni tih a Chiang a ni," a ti.

Pension hrim hrim, senior citizen-te pension hlawh la lova tang thup a, tihfel loh awm khawm teuh, tifel ta duak anga sawi chu a dikloh dan sawiin, MNF kum 5 sorkar leh ZPM kum 2 sorkar chhunga pension an tihfel zat dik tak RTI zawhna chhanna a tarlang a. MNF leh ZPM sorkarin an tihfel zawng zawng belhkhawm pawh 13,450 niin, Chief Minister-in ZPM sorkar tihfel a tih zat a sawi 24,021 aiin a belhkhawm pawh 10,571 in a tlem a. ZPM sorkar tihfel zat phei chu CM sawi aiin 19,740 in a tlem zawk a ni a ti.

MNF General Secretary chuan ZPM hotuten sorkar hnathawk DA pek chhuah thu an sawi thin chu sawifiahin, Central hian a hnathawkte DA hi kum khatah vawi hnih January leh July-ah a tipung deuh ziah a. MNF sorkar khan DA vawi 6 a pe hman a, sorkar tawp thleng khan Central-in DA zaa 46 a pe a, MNF khan zaa 36 lai a pe hman, zaa 10 chauhin Central sorkar a phalo a ti a. ZPM sorkar kum 2 leh thla 2 chhungin DA vawi hnih pe tawhin, April ni 1, 2026 atangin zaa 2 pek belh turin a rel fel a. Central-in DA zaa 60 pek tura a tihfel laiin, ZPM sorkar chuan zaa 46 a tifel thung a, zaa 14 in Central an umpha lo a ti a, MNF sorkar laia bat aiin zaa 4 in an ba tam zawk," a ti.



## **CHAMPHAI ENFIELD KUT**

Mizoram Enfield Kutpui 2026 chu Champhai District-a Samthang khaw bul, Zopui phulah neih mek a niin zanin hian an tiak ang.

Champhai Buffalo Motorcycles Club ten an huaihawt he Mizoram Enfield Kutpui ah hian Mizoram State chhung khaw hrang hrang bakah North East India State zawng zawng atangte, West Bengal leh India ram pawn, Nepal atangte in Enfield Riders 400 dawn an kal a, mahni hnam zai leh lam, hun hman ni a, Samthang khawtlang tanpuina hlanna hun leh Pi pute hmun hlui thenkhat tlawhin hun an hmang. Rider te an thlen belh zel a ni.

He Kutpui thlengtu Champhai Buffalo Mototorcycles Club hruaitute hnen atanga thu dawn danin vawiin hian Infiamna Item hrang hrang hmanga intihlimna hun hman a ni ang a, zan lamah Musical Concert neih leh tum a niin hemi zawh hian an tiak nghal dawn a ni. Tuna an kutpui hi, Mizoram Enfield Kutpui neih tawh zawng zawngah Riders Registratrimon tam ber tum a ni.

